

wann er getrocknet / durch ein Leder von dem Gold oder Silber / welches er zu sich genommen hatte / kan geschieden werden: Vnd hat der Mercur. solche Eigenschafft / daß er allzeit auß der Erden mit ein Metall / vnd auch das beste auff einmahl her auß zeucht / vnd so dasselbe her auß gezogen / auch endlich das schlechtere zu sich nimmet: Als zum Exempel: Wann in einer Erden Gold / Silber / Kupffer vnd Eisen wäre / so würde der Mercur. erstlich nur das Gold allein zu sich nehmen / vnd hernach das Silber / dann das Kupffer / vnd das Eisen ganz vngern / wegen seiner unreinigkeit: Zinn vnd Bley aber auch gern; am allerliebsten aber das Gold / wegen seiner Reinigkeit / an welcher es dem Mercur. für andern Metallen am gleichesten ist.

CAPUT VII.

Ein andere Demonstration im
Trockenen Wege.

Setze vnter eine Muffel ein gute Capellen / mit Bley zu treiben / vnd setze auch darzu ein Korn Gold / so ganz fein ist / doch daß du dasselbige zuwohr wol wegest / vnd das Gewicht behaltest; Laß also das Gold mit dem Bley auff der Capellen blicken / so wird dein Bley in die Capellen gehen / vnd das Gold bleich gelb darauff stehen bleiben; welche bleiche dann nichts anders verursacht / als das Silber / welches